

COLLECTIVITE TERRITORIALE DE CORSE

ASSEMBLEE DE CORSE

6^{EME} SESSION EXTRAORDINAIRE POUR 2010

16 ET 17 DÉCEMBRE 2010

N° 2010/E6/71

**QUISTIONE A BOCCA POSTA DA SAVERIU LUCIANI
A NOME DI U GRUPPU « FEMU A CORSICA »**

Ugettu : cummissione di ricutamentu - Lingua corsa

O Sgiò Presidente,

A rivendicazione nata intornu à u Riacquistu, à tempu pulitica, suciale, economica, culturale è linguistica, hà finitu oramai i so 40 anni. Da ciò ch'ellu s'aspettava tandu à i ghjorni d'oghje, ci sò state tappe significative, ma chì ùn bastanu micca, riguardu à l'ogettivi di salvezza, di prumuzione è di sparghjera generalizata di a lingua.

Ammenteremu solu l'ultimu pianu di furmazione (PRDF) avviatu à partesi da 2007, per 6 anni, dispusitivu à prò d'una generalisazione dumandata da tutti l'eletti di st'assemblea. Stu pianu, a sapete, hè statu un travaglione almanaccatu cù l'aiutu d'un cunsigliu scientificu à capu di tutte e prublematiche ligate à a situazione di a lingua corsa.

Oghje ghjornu, s'è no cuntemu bè, simu à mezu viaghju, vale à dì à l'ora d'una prima valutazione. Aldilà di l'inchieste è di i sciffri, u raportu di a cummissione di cuntrollu permette di facci un'idea bella precisa di ciò chì v'è di ciò ch'ùn v'è.

A sta cummissione, u Statu ùn ci hè venutu per risponde à e nostre interrugazione. Or si sà chì a furmazione di i persunali insignanti ferma una competenza sputica di u ministeru, chì ùn riempie manc'à pena u so rollu. Ste competenze ch'ellu ci hà da vulè à turnà à definisce, a messa for'di norme di

l'accademia, stu statutu d'ufficialità à abbuccà, sò punti di primura maiò per l'eletti di a Corsica.

A' u statu, li dumandemu in stu frattempu di mette in ballu un pianu Marschall di a furmazione per mette a lingua à paru à l'ogettivi di u PRDF.

Hè capita ch'ella hè una bona a creazione d'una direzione di a lingua, u sviluppu annunziatu d'una struttura in Corti. Và bè, ma per chì fà ? Un' si tratta quì d'un prugettu qualunque; si parla di messa in opera d'una glottopulitica da arradicà a lingua, per u sempre, in bocca à u populu. S'è no ci sbagliemu, corci à noi, è sottattuttu corci i nostri figlioli.

Tandu ùn circate micca à burlacci ; u ricutamentu previstu per a struttura curtinese di dui urganisatori, quatri A, vale à dì un rispunsevule d'azione d'animazione è di cunsigliu linguisticu per u primu postu , è di u capu di serviziu di serviziu linguisticu per quill'altu, ùn si pò accettà cum'ellu hè stata fattu a settimana scorsa in Aiacciu, cù solu dui amministrativi à cumpone a cummissione di ricutamentu. Ste pratiche e cunniscimu bè. Ma sappiate intantu ch'ùn ne vulemu micca essene dumane i paganacci davant' à u nostru populu.

Allora, o sgiò Presidente, m'addirizzu quì à u Presidente di l'Esecutivu è aspettu a soia a risposta:

- site prontu à rimette in causa e cundizione di ricutamentu passata, di lampà una chjama larga à tutti l'attori prufesionali cuncernati ?

- site prontu à dumandà à quelli chì pratendenu à sti posti di dacci a so visione strategica, fendu un spostu puntellatu à nant' à ciò ch'ellu s'aspetta ?

- site prontu à mette in piazza una cummissione cumposta in parte da quelli ch'anu purtatu u pianu di furmazione, denduli l'alta rispunsabilità di sceglie l'omi o e donne in cundizione chjare, à nome di l'avvene di a lingua corsa ?

Vi ringraziu.